

BETICO CROES, NOS LIBERTADOR



Mañan 25 di Januari 1996, nos ta recorda un biaha mas e natalicio di e Libertador di Aruba, Betico Croes. Un dia cu nos como yiunan di tera mester recorda cu hopi nostalgia y orguyo.

Pero e aña aki ta un aña special pasobra aña 1996 ta hustamente e aña cu Aruba ta celebra e decimo aniversario di su Status Aparte, como tambe ta recorda e decimo aniversario di fayecimiento di Betico.

Y aña 1996 Aruba ta recorda cu 20 aña pasa Betico a percura pa Aruba inaugura su

Himno y Bandera. Awe cu nos lo recorda e natalicio di Betico nos ta bay recorda e luchador incansable pa cu e causa di nos pueblo.

Si awe Betico tabata na bida lo el a cumpli 58 aña di edad.

Betico tabata un homber simpel y humilde. E tabata un persona cu tabata tin semper un meta su dilanti den kico cu el por tabata haciendo. El a keda graba den nos memoria pa su grandeza, determinacion y corahe inigualable. Un hende a yega di bise: "Betico tur homber tin su prijs. El a

lanta para y a contesta: "Mi prijs ta Status Aparte pa Aruba".

Si e ta convenci di su opinion y su meta, no tin nada na mundo ni hingen persona na e mundo aki cu lo por strobe di logra esaki. Y un habilidad cu Betico tabata dispone di dje ta di por transmiti su idealnan den un idioma sencillu y transparente na su conciudadanonan. Y esaki a conduci na e hecho cu Betico y su pueblo a uni den mente, den pensamiento y ideal. Aruba a traha cu e speranza di un dia

por ta liber, un pais afor di e constelacion Antiyano.

Betico y su pueblo tabata UN den e lucha pa nos Status Aparte. Y si awe nos papia di Betico, automaticamente nos ta papia di Aruba. E sinonimo di Betico ta Aruba paso el a stima su pida baranca. El a entrega su bida pa e lucha. Y no e lucha pa Status Aparte so pero tambe e lucha pa e desaroyo y progreso di nos pais.

El a percura pa haci Aruba e perla den Caribe, un nacion chiquito pero cu un pueblo grandi den contenido y den amor pa nan lucha pa su libertad. E tabata dispone di un vision futuristico incomparable y consecuentemente a inverti hopi energia den nos economia, nos turismo, nos infraestructura.

Betico tabata e arquitecto magestral di nos pais Aruba. Betico a reviva e amor patrio. El a reviva e orguyo di ta un Arubiano. El a percura pa chiquito cu nos isla ta, pa henter mundo duna oido na e grito di Aruba pa su libertad. El a surpasa tur obstaculo, y el a kibra tur barera. El a halza nos corahe, el a halza e grandeza di nos pueblo, el a engrandece nos amor pa nos isla. Betico a siña nos ta orguyoso di nos origen, orguyoso di ta un Arubiano.

Nos a bira un pueblo uni den

un solo lucha. Un lema di Betico cu ta bin na mente ta: "Un pueblo uni hamas por ser hundi". Y ta e union aki a combati y desbarata tur obstaculo den caminda, pa asina awe e pueblo di Aruba por ta un pueblo cu su frente na laira, orguyoso y satisfecho di su lucha y sacrificio.

Pues Betico a percura pa Aruba a bira Aruba, "Antiyanonan" a bira Arubianonan. Y pa stranheronan cu a comparti nos lucha y sacrificio sinti nan mes Arubianonan.

E lucha pa nos Status Aparte no tabata un lucha facil. Pero ora cu tur otro a doblega na caminda, Betico a para firme, convincente y determinante. El a bataya contra nos Madre Patria. Hulanda hasta a proclame un rebelde cu cabez cayente.

Pero den e mesun rosea el a obliga Hulanda di respecta e deseo y e derecho di e pueblo di Aruba. Betico a traha planifica y a percura cu cada paso cu Aruba tuma ta pa garantiza e futuro di nos isla.

Su dedicacion tabata sin limite. E tabata esun yama pa concretisa e deseo di un Aruba liber. Y awe ta reina un respet y aprecio inmenso pa e luchador incansable aki.

Apesar di su funcion politico y gubernamental cu a exigi su dedicacion total, el a percura



Discurso G.F. Croes na aeropuerto despues di su yegada for di Hulanda, logro Status Aparte